



# SIUMUT INATSISARTUNI ILAASORTAATITAT

## NAQQIUT

Aningaasanut inatsimmi umiatsiaaqqanik tapiissutigineqartartut amerlasusaanut ersarissaaneq

29. marts 2012

UPA 2012/90

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Kingusinnerpaamik UKA2012-imi saqqummiunneqartussamik Aalisarnermik piniarnermillu inuussutissarsiutillit inuussutissarsiornerannik siursaaneq pillugu Inatsisartut peqqussutaat nr. 10, 20. november 2006-imeersumut allannguutissatut siunnersuummik Naalackersuisut saqqummiussinissaannik Inatsisartuni aalajangiiffigisassatut siunnersuut, taamaalilluni taamaallaat umiatsiaaqqanut nutaanut Kalaallit Nunaanni sanaartorneqartunut tapiisoqarsinnaasalersillugu.**

(Inatsisartunut ilaasortaq Karl Lyberth, Siumut)

### **Tunggavilersuut:**

Kalaallit Nunaanni umiatsialiorfinnik marlunnik Nuummi Maniitsumilu inissisimasunik peqarpugut. Taakku tamarmik inuussutissarsiutigalugu aalisarnermut piniarnermillu akuerisaasunik umiatsiaaraliortarput. Taamatuttaaq umiatsiaaqqat taakku Kalaallit Nunaanni pissutsinut immikkuullarissunut naleqqussarlugit sanaajupput, taamaattumillu soorunami Kalaallit Nunaanni atornissaannut naleqqulluartuullutik.

Manna tikillugu Aningaasanut Inatsit aqutigalugu aningaasanik inuussutissarsiutigalugu umiatsiaaqqanik nutaanik 14-it miss. tapiissutissanik immikkoortitsisoqartarpoq.

Taamaammat taamaallaat Kalaallit Nunaanni inuussutissarsiutigalugu umiatsiaaqqanik sannaanik tapiissutinik tunniussisoqarsinnaanngortillugu Aalisarnermik piniarnermillu inuussutissarsiutillit inuussutissarsiornerannik siursaaneq pillugu Inatsisartut peqqussutaat nr. 10, 20. november 2006-imeersup allanngortinneqarnissaa siunnersuutigaara.

Inatsisartut aalajangiiffigisassatut siunnersuumik akuersinerisisa taamaallaat Kalaallit Nunaanni suliffeqarfiit qulakkeeneqarnerat kingunerissanngilaa, aammali akuersineq avataanit tikerartitanik annikillisaanermut sunniuteqassaaq.

### **Pisortanut aningaasatigut kinguneqaatissat**

Aningaasaliissutit allanngorinneqarnissaat siunertarinqanngimmat, siunnersuutip pisortanut aningaasatigut ajorseriaateqarnissamat kinguneqarnissaa ilimagineqanngilaq. Taamatuttaaq allaffissornermut kinguneqaatissat annikitsuinnaanissaat ilimagineqarpoq. Siunnersuummik suliarinninnissaq, kingornalu allaffissornikkut ingerlatsinerit allaffissornermut sinaakkutit maanna atuuttut iluini suliarineqarsinnaavoq.

Siunnersuut aqutigalugu suliffissat amerleriaatissaattut ilimagineqartut akileraarutitigut isertitaqarnerulernikkut ikiorsiissutitigullu aningaasartuutikinnerulernikkut Nunatta Karsiata aningaasanik tigoriaannaataanut iluaqutaanissaat ilimagineqarpoq.

## **Inuussutissarsiortunut innuttanullu aningaasatigut kinguneqaatit**

Kalaallit Nunaanni akuerisanik umiatsialiorneq aningaasanik kaaviiartitsinerulernik kinguneqassasoq ilimagineqarsinnaavoq. Taassuma akerlianik umiatsianik nunani allani sanaanik eqqussuvisut kaaviiartitamikkut taassuma annertoqqataanik kaaviiartitsinikinnerulissasut ilimagineqarsinnaavoq. Taakku saniatigut siunnersuut innuttanut kinguneqaateqartussaannngitsutut ilimagineqarpoq.